

17.oktober 2016

Ilaqutarittut inuunermut iluaqutaanerusumik sulisoqarnermut politikkeqalernissaq anguniarlugu Naalakkersuisut UPA2017-mut iliussissanik nassuiaasiornissamik peqquneqarnissaannik Inatsisartut aaliangiiffigisassaattut siunnersuut.
(Inatsisartunut ilaasortaq Sara Olsvig, Inuit Ataqtigiit)

Siullermik oqaluuserisassanngortitsisumut qujanaq. Siumumiit imaattumik oqaaseqarfigissavarput.

Nunatsinni kulturitsinni aallaaveqartumik inuuniarnermut pingaaruteqarluinnartut ilagaat avitseqatigiinneq suleqatigiinnerlu. Taamak oqaaseqarninnut patsisigaara piniartuusup piniakkami pikkorinnerusup aqutsilluareernerisigut piasarsaq angerlaanneqaraangat arnat meeqqallu sulineri aallartinneqartarmata, taamaasilluni sulineq atuartitsineq angerlarsimaffillu imminnut qilernikuullutik avissaartitassaanatik taamaattussatut isigineqarlutik atortinneqarmata.

Ulluni nutaaliasuni suliffeqarneq atuutilernikuuvoq nunat kitaamiut atortitaasa assinganik ingerlatsisoqarluni, tassalu nalunaaqqutaq malillugu ingerlasoqarpoq, amerlanerpaat nal. 8.00 suliarriorlutik sisamanut soraartarput, pisortaaniaraannilu piffissaq suli annerungaartoq atortariaqartarluni.

Piffiit qaangiuttut takutitsiviupput suliffeqarfinni napparsimanerit ikigisassaangitsut atuummata, taamaattoqarneralu qularutissaangitsumik assigiinngitsunik patsiseqartarpoq, taamaattorli maluginiagassaavoq ukiuni kingulliunerusuni uippakajaarnerit saqqumneraluttuinnarmata.

Uippakajaarnerit amerlasuutigut angummanniarnernik ulapipilunermillu aallaaveqarsinnaalluurtut ilisimaneqarput. Angajoqqaanut suliffimmi atukkat saniatigullu angerlarsimaffimmi atukkat imminnut naapertuukkunnaaraangata inummut ilungersunarsinnaasarput, allaat soraartariaqalernermik kinguneqarlutik uffali angajoqqaat ilisimasat pigisaat suliffeqarfinni pisariaqartinneqaraluurtut.

Maluginiagassaavoq angajoqqaanngortartut akornanni maanna anaanaasut kisimik paarsisuu-sanngimmata, aammali ataataasut anaanatulli annertutigisumik perorsaanissaminnut pisussaaffik atorussuttarmassuk. Ilisimaneqarpoq meeqqat mikinerini nappaalanerit imaaginnavittarput, kisiannili akuerisaasumik suliffimmit peqanngiffigisinnaasat tassatuaavoq ulloq siulleq paarsisumik ujaasinissamut atugassaq naak meeqqap napparsimanermini angajoqqaaminit paaqqutarineqarnis-sani pisariaqartinnerusaraa, periarfissallu eqqarsaatigineqarsinnaasut ilagaat s.a. maanna ittukkut ningiukkut suliffimmi akuerisaasumik ernuttamut napparsimatitsinermut paaqqutaqarsinnaaneranik isumaliuteqarnissaq, taamaasilluni ilaqutariussuseq nukittorsarneqarluni suliffeqarfiit peqatigalugit aqqissuusinnaaqullugu

Nunani allani akunnerit sulisinnaanerit ikilillugit atorneqarsinnaallutik inissisimasarput, takorlooruminarpoq s.a. arfineq sisamaniit pingasunut ilaqutariit sulisinnaanerat inissinneqarpat meeqqat ullaakkut pisariaqartitaanik naammassinnissinnaaneq annerussagaluartoq, ualikkullu meeqqamut aallernissaq, niuerniarnissaq iganissarlu piffissaqarfigineqarnerulaalersinnaallutik. Sulineq suliffeqarfik peqatigalugu aqqissuuneqarnissaavoq suliassat naammassineqartussat eqaatsumik aqqissuussiffiginerisigut qanoq tamanna naammassineqassanersoq susassaartut peqatigalugit aqqissuunneqartariaqarluni.

Nunatsinni meeqqat inunngortartut amerlisassagutsigit saniatigullu utoqqaat amerliartortut sullinneqarneri pitsaassusaat qaffasissumi inissisimasoq qulakkiissagutsigu allaqussinnaanngilaq

sulisinnaanerup ukiuini sulisinnaasut amerlanerpaat suliffeqarfinniinnissaat qulakkiissagutsigu ilaqutariit atugaat ilanngullugit qiviartariaqarpavut.

Utoqqaat amerlasuutigut ilaqutariit isumassuisuuneranik isumalluuteqartarput, s.a. utoqqaq napparsimappat ilaqutariit akornanni suliffimmiit akuerisaasumik paarsisinnaaneq ilanngullugu inissaqartinnissaat oqaluuserineqartariaqarpoq, taamatullu nappaatit akiorneqarsinnaanngitsut piutillugit ilaqutariinnut oqilisaataasinnaasut qiviarneqartariaqarlutik.

Suliffeqarfiit ilaqutariinnut inussiarnernerusut atorneqalerpata qularnanngilaq suliffeqarfinnut tunniukkumasat annertusisinnaapput, aammalu sulisut pikkorissut aalajaatsullu tigungmiinnarneqarnerulersinnaassallutik.

Nunatsinni anguniarparput ilinniarluarsimasut amerlanerpaat akisussaaffinnik kivitseqataallutik tigusissasut, tamatumalu kingunerisaanik inuusunnerumaat amerligaluttuinnartut sivisunerusumik ilinniarfimmiittalerput, taamaasilluni suliffeqarfinni sulinerit kingusinnerusukkut aatsaat pisarlutik. Mianernartua tassaavoq meeraanermiit suliffeqarfinnut atassuteqarneq annikilliartormat taamaasilluni aamma suliffeqarnermut isiginnittaaseq allanngoriartuinnarluni.

Siumumiit pingaartipparput kajumissaasiineq atorlugu ingerlatsisoqassasoq taamatullu pisortat siuttuusariaqartut ilaqutariinnut inussiarnernerusumik suliffeqarfinni politikkeqarnissamik alloriarnissamut maligassiuisuullutik, taamaasilluni tamakkiisumik isiginnilluni ilaqutariinni atassuteqatigiinneq isumassoqatigiinnerlu annertusarneqarsinnaammat.

Ilaqutariinneq pingaartillugu suliffeqarnerup ilusilersorneqarnera naleqqussaannikkut anguneqarsinnaasoq Siumumiit upperaaput, taamaasilluni inuiaqatigiinnut akisussaaffiinnik kivitseqataaneq naleqqussaajuarnikkut ingerlanneqarsinnaammat.

Taamak Siumumiit oqaaseqarluta aalajangiiffigisassatut siunnersuut taperserlugu Inuusutissarsiornermut Ataatsimiititaliamut ingerlasussanngorlugu inassutigaarput.

Suka K. Frederiksen
Siumut